

A MASYU GA KYALA

MMASIKU GA BUMALIKISYO AGA

✎ Naloliloli lusako ukugomokela pakati pa bandu ba kiSpanishi aba kang'i ulubunju ulu. Kang'i une nguswiga linga Jim ikwega iki. O, umwene ikwega ukwegelela. Une ngali ndinabo ubwegelelo ubu abimbaji abanini ba kiSpanishi baatendike akabalilo kako une naali kuno iyolopu palikimo nu Nkundwe Garcia. Kang'i une ngwibwa akimbo akanini kala abene bimbaga kwa une. Loli, o, mumo une nakaganile fiyo! Kang'i abana bala lilino bosa bakulile kang'i begi. Une ngupilika ukufuma kubene apa na apo. Kang'i une ningile ulubunju ulu nukumbona u Yosefu unnini, kang'i lilino ikyene naloliloli kibombile ikindukimo kwa une, kang'i une naali naloliloli nsangaluke ukukubona ugwe.

² Kang'i, lilino, une ndi ni lisyu limolyene une mbagile ukuyoba mu kiSpanishi. Mukulonda umwe ukulipilika ilyene? "Hallelujah!" Une ndisakwibwaamo siku i lisyu lya . . . ukugela ukuti unkikulu gwamapuli ambilike une akabalilo kamo. Lilino, une mbagile ukuyoba iki nubusobi bosa, umwe muketile, loli ikinunu ukukinda une mbagile ukukumbukila kyaali yo "oye." Uko kutalusya? *Pilika* une. *Pilika*, "oye." Kang'i polelo kisita kwibwa, "Gloria a Dios!" Bunoge buki! O, une naali nulusako ukuya nkayakakulumba, Mexico City, ukuyoba nabo abene kulakula. Gwe nahobwiike fiyo! Kang'i bwila na . . .

³ Une naali ku Finland bo mfumile kula. Kang'i akabalilo kosa kikungumbusya une mumo nayobelaga nu nkikulu unnini gwa kiFinnishi. Abene balindwele une kuno batigi "bethany." Ikisu kilikyosa kili na minogono gabo bene. (Une, umwe mukupilika ukogomokela kwa masyu, une ndi kifuki fiyo ku ikyo? Umwe mwesa mukupilika? Apo po loli.) Unkikulu unnini uyu, umwene ali mundu ununu fiyo. Loli umwene aali bo yuune, umwene aliganile ukuyoba fiyo. Kang'i unsanusyi . . . umwene ayobaga naloliloli nakalingalinga, kang'i—kang'i unsanusyi alinkusita kuyoba nakalinga ukufwanikisya ku isi umwene aalondaga ukuyoba. Kang'i umwene imaga kang'i ikisyo kyake kyayaga kikeseфу, umwene aatile, "Une mbilikisye ikyene ku bandu bala ku Babeloni."

⁴ Loli, umwe mumenye, une ngetesisye ukuti syosa i—i injuni syosa sikwimba Nkisungu, imbwa sikukema Nkisungu, abana bikulila Nkisungu. Une nguswiga tuli nu lutamyо luki uswe munjila yiliyosa. Loli aligwesa gwa uswe twikwinogona ukuti injobelo yitu—yitu yisakuyaga njobela ya Mfyinjaelifu,

momumo. Loli uswe twe twambilile Mbepo Mwikemo, isyo syo bwanaloli, panongwa yakuti uswe tuli ni njobelo Yakumwanya.

⁵ Uswe tuli nu Nkundwe Rowe apa na uswe ulubunju ulu, umwimilili ukufuma ku Washington. Une ngusubila umwene abombilimbombo pasi pa ba President bahano pamo bahano na yumo, ba President bahano na babili. Kangi umwe mumenye mumo une ngwipilikila nimile apa, pa kigemo iki, ukuyoba, nu mundu bo uyu itugesye kunyuma yangu. Loli akapango kake ko kabalilokosa kaali kapamwanya kwa une, kangi fiyo akabalilo kako umwene. . . Une ngusubila umwene aali gwa Luteri, linga une ndikusoba, gwa Katolika pamo Luteri, Luteri. Kangi umwene aatile umwene. . . ikindukimo ukufwana nukwafula pasi pa kisasa mu lukomano lwa kiPentekosto, kangi umwene aasumukile mmwanya. . . Kubumalikisyo umwene alinkuyaga injila ya kukigemo, kangi, bo umwene abombile, Untwa alinkwika pa mwene nukunsaya umwene fiyo mpaka. . . Une ngwinogona umwene abagile ukuyoba mu njobelo isyakufwana hano na sibili isyakukindana. Kangi aatile umwene aagelile yimo, “iyene yaatoligwe,” polelo alinkugela iyingi, “iyene yaatoligwe.” Kangi une ngusakikisya umwene abagile ukuyoba iki Spanishi mumo mwesa mubagile. Polelo umwene—umwene aagelile syosa mwa isyene, kangi isyene silinkutoligwa. Kangi, muketile, mumenye fiki, Kyala aali nnunu fiyo, Umwene aalikile nukumpa umwene injobelo iyi umwene akagelamo siku, umwene aatile, “Iyi yaabombile.” Isyo kutalusya. Une ngwinogona iyo yo njila ikylene kisakuyaga ku lubafu lungi lula.

⁶ Isyambukumbusyo nyingi isi une ngolile mu ndumbula isya kapanga kanini pala, une ngusubila akene. . . oo, une ngwibwa kuko akene kali. Akene kali ukukinda apa kubuyobumo kifuki na Lukindi Tonto. Kangi une ngukumbukila ako. Une mbagile ukwinogona isya lisyu, “Lukindi Tonto,” kuko ikipanga kya Spanish Apostolic kyaaliko.

⁷ Une nayobaga nagwe untimi, “Ubu bukuyaga buyo ubukulumba fiyo ukuya nalo ulusasanio,” ubuyo bwingi, ikipanga ikipya, abandu banunu. Polelo une ngwinogona akene kikuyaga pa lukindi lwa lusasanio ilisiku limo. Umwe mwiputilege ku ikyo, ingilaga nukuya nalo ulusasanio. Lilino, une ngusubila ikylene kyo kwandisyakangi kwa ikyo iki uswe twalinakyo ku kipanga ikingi. Une ngukumbukila nimile pa lubingilo, nigemekisye ku lupaso, ukubuka nu kugomoka mu ngindi, ukugela ukusokamo pala pa kabalilo nkilo, ubwene bwali naloliloli bwikyele ubu une ngibwamo siku. Kangi ndinako u—u bwegelele bwabalindwana, abatubwa, na balumyana aba baliimbile nukutendeka ubwegelele. Kangi abene bagelaga ukwimba “Itika Itolo,” kangi abene balinkusita kwimba kanunu nubutalusyi itolo, umwe mumenye. Abene balinkuti, mbuyo bwa “itika itolo,” abene yapilikigwaga panja ukuti, “itika yeonea,” muketile.

⁸ Kangi une ngukumbuka Rebekah, umwanundindwana gwangu, Sarah, kangi palema abene bikuti, “Baba, imba, kina ubwegelelo ubunini bula ubwa banini...” Mbuyo bwakuti batigi “Spanish,” abene baatoligwaga ukuyoba ilisyu lila, balinkuti, “balindwana Spinachi, balindwana banini spinachi bikwimba ‘Itika Itolo.’”

⁹ Ena, une ngukumbuka abene bakongile ulukomano. Ulusasio lwaali pa bene, kangi abene bakongile ulukomano injila yosa ku Kiloboko kya Kunamayolo. Kangi une... akandu kanini kalinkwiyimika mu ndumbula yangu akabalilo kako nsokengemo mu California, Nkundwe Moore na une, nu Nkundwe Brown, ukufyukila ku capitol. Kangi une bo mbukile ukukinda inyumba yila ubusiku bula, abana bala bimile pala bikwimba ako, “Umwene ikukupakisisya ugwe.” Umwe mulupilike ulwene. “Ukukinda ndulumuli pamo mmisyungululu, Umwene ikukupakisisya ugwe.” Utubalilo twingi mfishu ifihesya, pa buyo ubulwilabwite ubwa kulwana lwa kisukyosa, ukugela ukutwala Indumi ya Kristi, Une nakumbakaga abalindwana na balumyana bala bikwimba ulusumo ulo kwa une, “Umwene ikukupakikisisya ugwe. Ukukinda ndulanga pamo mmisyungulu, Umwene ikukupakikisisya ugwe.” Polelo ikyo kyo lusasio lukulumba, ubutuli.

¹⁰ Ukwagana nu ntimi gwinu unnunu, kangi nhobwike fiyo ukuti ikipanga kyumi kangi umwe muli nayo inyumba inywamu immogi apa, ibatugesye mwesa, ubuyo bwingi ubwakubika amagali. Itolo ubuyo bwabwanaloli mmaboko ga Mbepo Mwikemo, linga uswe itolo tubagile ukumpela Umwene akabone akene nukuti amanye ukuti uswe tukolela ku lusasio. Umwene, une ngwitika Umwene ikupaga ulusasio.

¹¹ Lilino, ikilo iki uswe tuli ku kipanga kya Nkundwe Outlaw, ikipanga kya Jesus Name, ukukilania ulubafu ulungi. Kangi Nkundwe Outlaw, une ngwitika mu... gwa kipanga kya Bapostoli, yope. Une ngwinogona umwene ikukikolela itolo ingamu yake, ikipanga, i Ngamu ya Yeso. Une ngwinogona umwene gwakipostoli ndwitiko. Kango polelo uswe tukuyaga kula ikilo iki. Kangi lilino uswe tutikuyoba ku kipanga kya kiSpanishi, “lilino isaga kulakula,” umma panongwa yakuti mwimege pakabombo’kinu. Kangi polelo lukuyangapo ulukomano ulukulumba ulwa ba Christian Business Men, ukwanda pa Kina, ukufuma pakwigala ubulumbilili mu fipanga ifingi, pa Kina. Kangi ulukomano ulu, abene bikuyaga na balumbilili abapamwanya, kangi polelo Oral Roberts, kangi unkundwe yumo ugwa ki Methodisti uyu apokigwe lululu ulu, kangi abene bikumpala umwene ukuya ndumbilili gwa maka fiyo. Kangi une nsisimikisye umwe mukwikyelaga ingomano isi. Kangi umwe bana-batubwa, abene bali nulukomano kula ulwa batubwa bope, mumo unkundwe afumwiisye. Une ngutwala

abana bangu kula ukuti abene babagile ukwingila mula pa iki. Kangi polelo lilino kula, uswe tukuhobokaga ukuyaga nanumwe. Untwa abasaye umwe mwesa.

¹² Kangi lilino une ngulonda tusanukile mwi Bangeli nukubala limo mwa Lisyu Lyake ilisayigwe. Kangi une nsalile ulubunju ulu, pakabalilo kanandi itolo, une ndikulonda ukubakolelela umwe apa akabalilo katali fiyo, ilisimbo limo, kangi limo lya gene likwagigwa mwa Samueli Gwakwanda, ilingi likwagigwa mu Yesaya. Kangi une ngulonda ukubala mu Yesaya tasi. Kangi une . . .

¹³ Ngimba mwesa mubagile ukumbilika kanunu, ukusyungutila mosa? Pakati pa fyakuyobelapo ifi, ifyene fikufwana fyitegelile fiyo kwa une, une ngamanya nongwanki. Umwe mukupilika kanunu uko, fyusya ikiboko kyako. Kanunu, kanunu.

¹⁴ Lilino, une ndi panini itolo masyo gaalile, ena, ikyo kyo kufuma ukuyoba fiyo. Kangi ukufuma une njege apa na bakundwe ba kiSpanishi, ukufwana ifyinja kalongo na fihano na kimo ifi fikindilepo, une ngusakikisya, lumo ifyinja ukufwana kalongo na fihano na kimo pamo kalongo na fihano na fibili ifi fikindilepo, ena, une nalumbililaga ukufuma lula. Polelo une nakatele lula, une ndinkuti, kangi une ngaali ngatele, loli une ngukindilila nipyana lya Kyala.

¹⁵ Lilino uswe tusanukile kwa Yesaya 40, untu gwa 40 gwa Yesaya; kangi untu gwa 1, pamo untu gwa 3 gwa Samueli. Kangi bo uswe tukukolelela ubuyo ubo kukubala kwa Lisyu, une ngulonda lilino ukuti uswe twinamisye imitu gyitu itolo pakabalilo ku lwiputo.

¹⁶ Tata gwitu Gwakumwanya, uswe tukupalisya umwisyugu pa lusako ulu ulwakwiima mu nyumbinyikemo innunu iyi iyi yimikigwe kwa Kyala ni mbombo Yake. Kangi panongwa yakuti uswe tumenye ukuti abambombi Bako bimile kunyuma ya kigemo iki pamo ikigemo utubalilo twingi, kangi nu bumi bwimikigwe ku bubombelo Bwako.

¹⁷ Kangi ukuti *iki*, ulubunju ulu, kikutwala kangi ulukumbusyo, lukumbusyo lwa lusasano ulu lwandaga itolo, nu Mbepo Mwikemo uyu aasulwike nduko lwa Lumuli ulunywamu, ukufwana yi Mbanda ya Moto, kangi Iyene yaayobile ukuti Indumi iyi yikupyagilaga ikisu kyosa. Kangi lilino umwisyugu iyo yo syambukulu. Indumi yikolile umoto ukwisila mbanyambala abakulumba, ukufuma papo balibonege Ilyene, bo yu Oral Roberts na Tommy Osborn, kangi Tommy Hicks na bingi abangi. Kangi ukwisila mukugela uko uswe tubikile palikimo, uswe tukuketa Indumi yaasisye imyoto gya lusasano nkisu kilikyosa pasi pa Kumwanya, gwa Ndumi yapentekosti. Kuli iki uswe tukugwa ulupi nu lutufyo kwa Ugwe, O Kyala Gwamaka.

¹⁸ Kangi lilino umwisyugu uswe tukusuma ukuti Ugwe kutendekesyaga indumbula yitu, ukwitendekesyela ku Kunyakiligwa ukukulumba uku kwisakubonekaga lululu ulu, uswe tukwitika. Kangi linga indumbula syitu sikaya mbwitendekesyeye ku ikyo pamo ku kalikosa akene aka Ugwe utupayiile uswe, uswe tukusuma Ugwe tuswege uswe pakusyalapo kwitu, kangi kuyobaga kwa uswe umwisyugu ukwisila mu Lisyu Lyako. Nsayaga untimi gwa kipanga iki, abakulumba, abalindilalakipanga, na bosa abapasi, bamo mwantimo. Sayaga abimbi abanini, kangi unkubapiano, abakubanyimbo. Bosa palikimo, sayaga abene aba bikwingila mfipata fya buyo ubu. Bali sookaga apa abene basanusigwe akabalilo kalikosa, ukuya kifuki panandipo kwa Ugwe ukukinda mumo abene baali akabalilo kako abene bingilaga. Paga ikyene, Tata. Kangi ikyene kiliyaga lululu, nalu lubunju ulu, kabuno uswe tukusuma iki mu Ngamu ya Yeso. Amenii.

¹⁹ Lilino ukusanukila ku Buku gwa Yesaya, untu gwa 40, uswe tukubala.

Kibaga umwe, kibaga umwe bandu bangu, ikuti . . . Kyala.

Yoba ugwe amasyu gakubatamisa kwa Yerusalemu, kangi kuuta ku mwene, ukuti ubwite bwake bumalike, kangi ubutuluanongwa bwake buswegigwe: kabuno umwene fikuti ambiliile ukufuma ku kiboko kya NTWA kabilikabili panongwa ya . . . mbibi syake.

Amasyu ga uyu ikukuta mmatengele, Tendekesya ugwe injila ya NTWA, tendeka ngolofu mu lulanga unsebwwe kwa Kyala gwisu.

Ifikoga fyosa fisakufyusiyigwa, kangi i fyamba ni ndananda fisakutwaligwaga pasi: kangi ifiniiongafu fisakugololigwaga, kangi ubuyo bwa magengelemba butengamu:

Kangi ulwimiko lwa NTWA lwisakusetuligwaga, kangi aligwesa isakulubonaga ulwene palikimo: kabuno undomo gwa NTWA fikuti guyobile ikyene.

Lilino mwa Buku gwa Samueli, Samueli Gwakwanda, untu gwa 3, une ngulonda ukubala amanandi ga 1, aga 2, kangi aga 19:

Kangi umwana Samueli aabombelaga kwa NTWA pankyeni pa Eli. Kangi ilisyu lya NTWA lyaali lipala mmasiku galagala; yikalipo imboniboni yapabwelu.

Kangi ikyene kilinkuyapo pa kabalilo kala, akabalilo kako Eli aalambalele pasi pabuyo bwake, kangi amaso gake gaali mapupale, ukuti umwene aatoligwaga ukuketa;

. . .bo inyale ya Kyala yikasimisigwa mu tempeli ya NTWA, kuko ilibokosi lya Kyala lyaali, kangu Samueli aalambalele ukugona;

Ukutu u NTWA aakolile . . .kangu umwene alinkwamula, Apa une ndipo.

Amanandi ga 19:

Kangu Samueli alinkukula, kangu u NTWA aali nayumwene, kangu Umwene alinkusita kwitikisya ukutu nagamo mwa masyu gake gagwe pasi pamfu.

²⁰ O, ago go masimbo mingi ukufwana aga uswe twabagile ukuyobapo ku mwesi, kangu uswe twabagiile ukwegapo ukupilikisya kwingi ukufuma ku lisimbo ilikulumba ili. Loli ulubunju ulu, kangu uswe tuli nago amaminiti malongo mabili itolo ukutu tusooke nkabalilo kanunu ukufuma. . . Une ngusakikisya isukulu ya Ndungu yimalike pamo yikwisa ukufuma apa, une ngamanya. Loli, mulimosa, une ngulonda ukubombelimbombo ilisimbo lya, *A Masyu Ga Kyala Mmasiku Ga Bumalikisya Aga.*

²¹ Akene ko kabalilo kapamwanya fiyo. Uswe tukusyagania ukutu mumo uswe tukuyobela ukufuma Mmasimbo, ukutu litile, “Yikaliko imboniboni yapabwelu mmasiku ga Samueli.” Polelo, “Kuko yikayako imboniboni,” ili Bangeli litile, “abandu bikupyutigwa.” Uswe tukufimbilisigwa ukuya ni mboniboni. Kangu imboniboni sikwisa ku nsololi, kangu ilyene lyo Lisyu lya Ntwa liyobigwe ku bene.

²² Kangu uswe tukusyaga ukutu Eli akaali nsololi mma, Eli aali mputi. Kangu umwene ayaga nkangale, kangu amaso gake gayaga mapupale, kangu umwene aatoligwaga ukuketa ukutu asyungutilege, aali nnyambala nnywamu nsito. Kangu umwene alyaandile ukuyileka imbombo ya Ntwa yiyege nsitakubombigwa.

²³ Kangu ikyo kyo kindukimo bo ikylene kiyiliile umwisyugu. Une ngwinogona ikipanga, ikibugutila ni fipaaguko, ifyene fili pa ngunda akabalilo katali, kangu ifyene fyandile ukuya fyolo. Kangu imbombo ya Ntwa yikulekegwa kisita kubombigwa, i Lisyu lya Bwanaloli, panongwa yakuti ikipanga, mu kyene, kisile ukuya kipupale-maso. Kangu uswe tukulonda, umwisyugu, a Masyu ga Kyala ukuyoba pakati pitu, ukutugomokesya uswe.

²⁴ Kangu, keta, Eli aalambalele pasi, kangu i . . . ukuketa kwake kwatoligwaga. Umwene aali mputi. Kangu abene bakaali nayo imboniboni yapabwelu ukufuma kwa Ntwa. Kangu ubo bupina ubukulumba!

²⁵ Kangu Kyala aafingile ukumasya ubupina bwa sala iyi. Umwene bwila ikubomba ikyo. Kangu uswe tukulonda a Masyu ga Kyala umwisyugu, ukumasya ubupina bwa sala iyi, ukumasya akabalilo aka uswe tukwitugasyamo. Kangu ukufuma papo

Umwene afindinge ikyene, uswe tubagile ukusisimiksyu ukuti Umwene ikwimaga nu lugingo Lyake. Uko ko kwifuna uko umwitiki alinako mwa Mpeli gwake, ukuti Umwene aafingile ukumasya ubupina.

²⁶ Kangi, umwisyugu, inongwa yimoyene iyi ikipanga kili mbwitugasye ubu ikyene kilimo, yo nongwa yakuti galipo amasyu mingi fiyo, amasyu mingi fiyo agangi ukukikwabila ikipanga ukusokako ku Masyu ga Kyala, mpaka tukwilamwa fiyo ukuti bingi babagile ukupilika a Masyu ga Kyala palema nalinga Agene gayobile palapala nkati mmyabo. Abene lumo bakabagiile nukulipilikisya Agene, panongwa Agene gikuyaga kindu kihesya ku bene. Abene bitwele bene fiyo ukuya katikati na masyu ga lisiku ili!

²⁷ Kangi linga uswe tukuketesya, mu kubala kwa Lisimbo, ukuti a Masyu ga Kyala gaali mahesya ku bene.

²⁸ Kangi ukwene mo kuyilile umwisyugu kangi, ukuti a Masyu ga Kyala...Galipo amasyu agangi mingi fiyo. Kangi polelo linga Kyala aafingile Umwene ikutupaga uswe Ilyo, kangi linga amasyu agangi gikulwana na Masyu ga Kyala, polelo agene kokuti masyu ga ndugu, ukutufubania uswe, ukuti tulingapilikisya a Masyu ga Kyala akabalilo kako Agene gayobile.

²⁹ Kangi uswe tukuketesya ikyene kyaali kindukimo kifwanefwane ku kila na Eli kangi na Samueli, loli Eli alinkusyagania palapala itolo ukuti aali yo Kyala. Kangi agene gali naloliloli ma—ma mahelu pa Eli. Panongwa yakuti, a Masyu ga Kyala, ukuyoba kwa Samueli, galimbulile umwene isya butulanongwa bwa Eli, kabuno umwene abapubiisye abanabalumiana bake, kangi abene begaga ihela kangi—kangi inyama ukufuma ku fyabupi. Uko kukaali kutalusya mma. Kangi abene bombaga ifindu mbusobi, ukukindana ni Lisyu lya Kyala.

³⁰ Kangi Samueli aali...ikindu kyene iki Samueli abagiile ukubomba, ayobaga katikati. Kangi umwene ilaamwaga panini ukubomba bo ulo, kabuno ikyene kyalwanaga nu buyo bulabula ubu umwene aatumigwe ukuswiligwa, Eli kangi mu tempeli. Loli Eli alinkuti, “Kindililaga ukuyoba.” Muketile? Kangi umwene aalimbulile umwene katikati ifi fyatigi fibonekege, ukuti Samueli...pamo, “Ilisiku lya Eli lyamaliike, ukuya mputi,” kabuno Kyala aayobile, kangi Kyala atumaga i Ndumi Yake ukwisila mwa Samueli unsololi. Ukupapigwa ukuhesya fiyo, ukubikigwa kwa Ntwa ukufuma bwanike. Kyala aayobile ku mwene, bo mwanike, kangi antendekeyaga umwene ku mbombo iyi yaali kunyeni. Kangi akabalilo ka Eli kisaga kubumalikisyo.

³¹ Galipo amasyu mingi fiyo nkisu umwisyugu, mpaka ikyene kikuya kindu kikafu naloli, panongwa yakuti agene gikugoga

a Masyu ga Kikindefipeligwa. Galipo amasyu gamminogono mingi fiyo, amasyu amanywamu aga banyambala abamaka aba baminogono, mpaka, mbutugasye bwabo bwaminogono, bikusenyenda nifisu. Abene bakaya itolo bandu kukinda-kilo, loli abene bikusenyenda ifisu, ukutwala ifibugutila ifikulumba palikimo, isasano ingulumba, immogi. Kangi umundu abagile ukufubanika panini. Ukwene kufwene ukufubania abene, na mumo ukuti ifindu ifi fikubuka nu koloka. Kangi galipo amasyu aga—aga gikufyuka mmwanya kangi ukubomba ifindu ifi, kangi ukwene kukupela a Masyu ga Kyala ukubikigwa kula kunyuma pa buyobumo, a Masyu ga Kyala gabwanaloli.

³² “Kangi a Masyu ga Kyala,” abene bikuyoba, “uswe tukumanyaga bulebule ukuti go Masyu ga Kyala?” Panongwa yakuti, mwisyugu . . . Polelo kyaali mwa nsololi unsisimikisigwe. Lilino, umwisyugu, tukumanyaga bulebule uswe agene Masyu ga Kyala, panongwa yakuti ko kuboneka kwa Lisyu lya nsololi. *Uyu* yo nsololi gwa Kyala. Kangi a Masyu ga Kyala gabwanaloli gikugomokesya itolo Kyala Nkindekipeligwa ugwabwanaloli, ugwabumi, ni Lisyu Lyake Ilikindekipeligwa, nu kubonekela Ukukindekipeligwa ukwa Lisyu Lyabwanaloli. Polelo uswe tumenye ukuti Ilyene lya Masyu ga Kyala. Panongwa yakuti, kangi ikyo Kikinde- . . . Galipo fiyo agangi mmalinga gamo, aga kifuki itolo gikugoga Ikyo. Loli, kumbukilaga, Agene gikumwekukaga, Agene gikusookaga! Agene gikubombaga iki.

³³ Lilino, galipo amasyu umwisyugu nkisu kya ndyali. Ago go masyu makulumba. Kangi abandu, nalololi, mu lisiku ilikumba ilya ndyali, abene bisa . . . Ikyene kyonganisigwe kyosa mu fipanga fyabo na fyosa. Kangi utubalilo twingi, isi uswe tuketile lululu ulu, ukuti ilisyu lya ndyali lyamakako ukukinda a Masyu ga Kyala mu fipanga, kisita iki angali abandu ba kiAmerika bakabombamo siku isi abene babombile itolo. Muketile? Abene angali bakabomba ikylene siku. Linga a Masyu ga Kyala gaabikigwaga nu bumi mfipanga, abene angali bakatendeka ubusobi bula. Loli amasyu ga ndyali gamaka ukukindapo fiyo nkisu umwisyugu ukukinda a Masyu ga Kyala, mpaka abandu bagulisye ubwabuke ubwakupapigwa bwabo u Bwakikristi panongwa ya lufubano lya kufumuka, ubumanyili, na maka ga ndyali. Isyene sya kukosya isoni ukuketa ikylene. Ikindu kilakila iki ikisu kiyitu kyapeliigwe, iki ikylene kibumbiigwepo, abandu basyumbutwike inyuma kangi—kangi tusalile ikindu iki uswe twaakilekile ku kisu ikingi kula. Kangi i—kangi i Plymouth Rock, kangi *Mayflower* na bene, ukwisa ukukilania kuno kangi—kangi ukwala ikyuma ikikulumba iki uswe tuli nakyo. Kyo kindu kilakila iki uswe tulwene nakyo namaka fiyo ukusookamo, uswe twibikiile twibene ukugomokela mfifugato fyake, panongwa yakuti ukuti i Libangeli likuyoba ikylene kikuyaga mu njila yila.

³⁴ Kangi ikibugutila kya Eli: umputi mbuyo bwa nsololi. Unsololi yo Lisyu. Kangi umputi yo kipanga.

³⁵ Kangi ukwene kwafikile pa buyo bumo bwakuti mpaka ukwene kwayaga kwalyaabwike fiyo mpaka i Lisyu likuya lihesya ku bandu. Abene batikukupilikisya Ikyene. Polelo ugwe ubagile ukuyoba Ikyene, kangi abene batikukupilikisya Ikyene, panongwa yakuti abene bakafundigwa ku Kyene. Paulo aayobile, “Linga ingangabwite yikupa ulukubo ulusitakusisimikisigwa, ywani ikumanyaga ukwitetendekesya mwene ku bwite?”

³⁶ Abandu bafundigwe ku i—i—i masyu ga kipanga, ingangabwite ya kipanga, “Uswe tukuya na bingi pa sukulu ya Ndungu ukukinda fyosa ifyene filinabo.” Ikyo kikaya nimbombo napanandi. “Uswe tulinabo mu mpaguko gwitu ukukinda gyosa igyene gilinabo. Uswe twe mpaguko unywamu ukukinda gyosa.” Muketile, ago go luko lwa masyu aga abandu bamanyisigwe ku gene. Mu lukindi, abene bikubuka panja ukwakwega abandu nukubatwala abene nkati. Malongo ga ma elifu ukubaasania maelifu mu lusasania ulukulumba, ukubatwala abene nkati. Ngimba abene bikulonda fiki? “Uswe tuli ni kipanga ikinywamu ukukinda fyosa. Uswe tuli ni kilundilo ikinywamu ukukinda fyosa. Uswe tuli kilundilo kinywamu—kikinde pa sukulu ya Ndungu. Uswe tulinagwe meya gwa kaya ikwisa ku kipanga kyitu.” Ifyo fyo fibagile ukuya losa finunu, loli linga ikipanga kilakila kikafundigwa ku Masyu ga Kyala, Ingangabwite ya Inongwainunu, kyo kinununki iki ikyene kikubomba?

³⁷ Kangi akabalilo kako akandu kikufyuka bo itolo kafyukiile pakati pa boma lyitu, kubonike fiki? Ikipanga kikaamenye Amasyu ga Ngangabwite, kangi abene bakaamenye isyakubomba. Ulufingo ulunywamu ulwa bukabi, ukalyoto gwa minogono ikwingila, kangi abene balinkukilania itolo ikindu kilakila iki i Libangeli lyasolwile, kangi baalingisye ikyene nkati. Muketile, amasyu ga ndyali! Kangi ikyene kisisimikisye ukuti ikyene kikilenie Amasyu ga bwiputiputi, pamo abene angali bakabomba siku isi abene babombile, Amasyu ga Nongwainunu. Panongwa yakuti uswe tufingiligwe ifindu fingi fiyo, uswe tufingiligwe ubukabi, kangi kisitakwilama loli fi uswe tukuyaga nafyo ifyene.

³⁸ Loli, pope, ikyo kitikusanusya nakimo kwa mwitiki. Sanukila ku Buku lya Bahiburi, kuntu gwa 11, pilikisya iki Umwikemo Paulo yula ikuyoba, mumo abene, mmasiku gala, “Balinkubeeta mu fipapafyang’osi ni fipapafyambene, baali balondo, basita buyo, balinkutoligwa ukwingila nkaya.”

³⁹ Une nabalaga mu Lukomano Nicaea, akabalilo kako inongwa inywamu sisege ku Nicaea, Roma, ifyinja bamia batatu ukufuma bufwe bwa Kristi, mu Lukomano Nicaea ulukulumba, akabalilo ikipanga ikulumba kyaalimile na iki kyaali kitalusye, abene baalondaga i Libangeli. Kangi abapinduki ba kiRoma aba kipanga kyakwanda kya Roma baliingisyemo ifimanyisyo, ukuti, ukufwanikisya itolo, mumo uswe tuli nagwe Krismas.

⁴⁰ Krismasi, Kristi akapaapigwemo pisiku lya malongo mabili namahano ilya—ilya Dizembala ukufwana mo une ngapaapigwemo umma. Fiki, ifyamba fya Yudai fyaali na matalala, kangi Umwene. . . Ikyene kikulwana ni sololi syosa isingi isya Libangeli. Umwene apaapigwe mu mpingo, mumo bakang’osi bikupapiligwa. Ngimba fiki Umwene aapapiligwe nkibaga mbuyo bwa nyumba? Umwene aali Kang’osi. Ngimba fiki Umwene akabopelaga itolo ku kigemo pamo pa kigemo Kyake kuko Umwene akomeleligweko, ikipingika? Umwene alongosigwe ki kipingika. Ugwe kulongolela ing’osi ku bubutigwe. Umwene aali Kang’osi. Polelo Umwene aapapiigwe akabalilo kako abakang’osi bapapigwaga.

⁴¹ Loli, umwe muketile, ukubomba ikyo, abene baali ni lisiku lya kyala-lisuba, ili, pa lubatiko lwalisuba, i—i lisuba mmasiku mahano ukufuma mu Dizembala gwa malongo mabili ukufika Dizembala malongo mabili-na-mahano, palipo ukwenda kunini fiyo, ukwa lisuba. Ilyene—ilyene likukindana panandi pisiku lililyosa, likuya litalipo kangi litalipo kangi litalipo mpaka iliyene likukoma ilisiku ilitali ukukinda gosa mu Julai. Kangi polelo, mu Dizembala, ilyene lisiku lipimba ukukinda gosa. Kangi polelo akabalilo kanini kala ka malongo-mabili-na-mahano, ukufuma pa malongo mabili ukufika pa malongo-mabili-na-mahano, abene baayaga nu lunyago lwa kiRoma nukusekelo lwa lisiku lya kupapigwa kwa kyala-lisuba. Lino polelo Jupitala, uyu yo kyala gwa kiRoma, kango polelo abene baalingisye ikyene, nukuyoba polelo, “Uswe tukwegaga Mwanundumiana gwa Kyala ni lilsiku lya kyala-lisuba, ukubika palikimo ikyo ukuya lusekelo lumolwene ulukulumba.” Ikyo kyo kikindene! Kangi, o, ifyakwingisyamo fifingi ifi abene babiikile mula!

⁴² Kangi abene akabalilo kako abanyambala ababwanaloli ba Kyala bala aba baalondaga ukwima ni Lisyu, bo yu Polycarp, Irenaeus, Martin, abanyambala abakulumba bala, kubwandilo, abikemo aba baalondaga ukwima nu Bwanaloli. . . Kangi akabalilo kako abene baatwele ukukindilila Lukomano Nicaea, bamo mwa bandu bala bakaaniigwe fiyo mpaka abasololi basookaga ukufuma ndulanga nakandu nakamo ukusyungutila abene loli kakapapa kang’osi, ukwitugasya ndukomano lula. Loli abene bameenye i Lisyu lya Kyala. Loli ukufumuka, amasiku kalongo na mahano gala aga ndyali syakoniilopa, kangi kyagatolile Ilyene. Polelo uswe twaali ni fyinja elifu ifya ngululo iyangisi, muketile.

⁴³ Loli Kyala aafingile ukuti Ingangabwite yila yikukubaga kangi. Bwila bikupilikisya ku Masyu agabwanaloli ga Lisyu, bwila ugwe ketesya ifi ugwe kubomba ni Lisyu.

⁴⁴ A masyu ga ndyali. Kangi uswe mu Amerika ni kisu kyosa, tuli na masyu aga gikuyoba nukulata umwisyugu, kangi ago go masyu ga Hollywood. Agene gakolile ikisu. Yumo alisooka

ukufuma ku Hollywood ni kindukimo, ugwe kukyagaga icyene paliposa nkisu. Lilino, uswe tukuketesya ukuti abene bapelile ululuko kuli bakikulu bitu, pa kufwala kwabo, akapeselo ka nywili syabo. Abene bapelile ukufwala kula.

⁴⁵ Ikipanga kibagile ukumanya a Masyu ga Ngangabwite ya Kyala pa ikyo! Loli kulipo ukufubanika fiyo panongwa yakuti ugwe kuketa abangi bikubomba bo lulo, ififwanikisyo. Komma siku ukwifwanikisya gwimwene nu luko lula ulwabwifwanikisyo, kabuno ulwene lukupyutigwa. Bwila pilika a Masyu ga Kyala, iki Umwene ikuyoba isyakufwana ni kyene.

⁴⁶ Kangi polelo uswe tukuketesya, ku Hollywood, abene bikufyusya ifindu. Kangi itolo unko une njobe itolo pa kabalilo pa iki bo tukali ukukindilila. Kyaalipo i—i kindu kyasookile lululu apa, ukuti u—u mundu mu Hollywood. . . Nakimo ukulwana nu mundu uyu lilino, umwene mfwe yu Kristi aalimfwilile, loli itolo ukubonesya umwe. Abene bapelile akandu akanini kaakoleligwe, abanike bikubombela imbombo, kakoleligwe “hula-hoop”, ntyonga-msana, pamo kindukimo. Kangi linga umwe mukuketesya ubuhuni ni findu ifi fikukonga ikyo, filiku, mwa banike abanini. Ikyo kikaya kitalusye.

⁴⁷ Lilino, Hollywood yiswile na—na balwanindusu. Lilino, aligwesa uyu amenye isyambukulu, amenye ukuti abandu bala kunyuma kula mmasiku gala, bala baali balwanindusu bo bi—bi binitu bakindanikindane, abene bakaali bandu banunu mma, abene baali bajambazi, abene baali bo yu Al Capone na Dillinger. Abene bali ulukino lwa Hollywood abene bikulukolela, pa—pa televizioni, abene bikulukolela, “Gunsmoke.” Une napiliike pa *Monitor*, ilisiku limo, ukuti umwinitu uyu ikukina ulwene, Arness pamo ikindukimo, pamo Arness, pamo une nibibwe ukuti ingamu yake yoani, kangi umwene abagile ukwega. . . Umwene ikwimilila Matt Dillon uyu ali yo nsikali mu Kansas. Kangi Matt Dillon aali nkomu bo yu kalulu. Umwene atusulile abanyambala malongo-mabili-nabahano-na-batatu kunyuma, abandu abasitanongwa, ukusooka panja pa Kaya ka Dodge kangi ukugulila mmatengele. Kangi akabalilo kako unnyambala ikwisa apo, uyu umunduyumo ikunkolela umwene nukumbula umwene ukuti aaliko umbibi yumo ikwisa apo, polelo syala panja pala kangi, akabalilo kako unnyambala ikwingila, umwene antusulilaga umwene ukufuma ku nyuma. Lilino uswe tukwaga umwene yo “kalyoto nkulumba” uyu ukwikilila. Fiki, u—u kwene naloliloli ko kutufya ubonangi. Loli abanike ba kisu kyitu babagile ukukubula ugwe fingipo ifya Matt Dillon ukukinda ifi abene babagile ukukubula isya Yeso Kristi. A—a—a maluuka, amaluuka ga ten-cent, kangi amaluuka ga fyakufwala, gikupayika twiswile utunini—utunini utundusu twa bana, nu tutili utunini utu—utu ugwe ubagile ukuula paliposa. Ikyene kili kanunu kyosa ukufwala ikyo, loli une—une itolo ngubabula umwe, umwe muketile. Polelo abene—

abene, ikisu kya biashara, bikupimba ikindu kila nukukaba ma elifu-elifu ga ma dola ukufuma pa ikyo.

⁴⁸ Uswe tulinalyo ili uswe tukulikolela “Ilisiku lya Mwikem. Patrick,” uswe tuli nago aga uswe tukugakolela aga “amasiku mikemo gabwiputiputi.” Kangi ikisu kya biashara kikupimba ikylene, kangi abene bikukaba ma elifu-elifu ga ma dola. “Ilisiku lya Yuba,” ifibugutila fya maluba. Fiki, ilisiku lililyosa libagile ukuya liyindikigwe kwa yuba. Umwene ali kubutali kumo, akangeele, buka ukankete umwene. Ikyo kisa kuyaga nutengo ukukinda amaluba gosa aga ugwe gwabagile ukuntumila umwene, pamo kilikyosa ikingi. Muketile, loli abene bikusala ikylene. Agene go masyu, kangi—kangi uswe tukwingilamo mulamula na ikyo. Ukwene naloliloli kukaya kutasuya’mma. Loli ngimba ugwe kubombaga fiki? Muketile, uswe tuli—uswe tuli itolo . . .

⁴⁹ Une ngugela ukwisa ku fundo apa ukubabula umwe ikindukimo, iki une—une ngwitika. A Masyu mapala, a Masyu ga Kyala.

⁵⁰ Lilino, uswe tukusyagania abene bikupela amakato. Kangi ngimba ugwe uketeesisye? Abalumiana bitu bisile ukuya “Ricky” kangi “Elvis.” Ugwe uli nayo umwana akoleliegwe ikyo, sanusyaga iyene nakalinga fiyo, nkolelaga umwene mbalilo “yumo” pamo “gwabubili” pamo ikindukimo. Komma, ikyo kibibi. . . Ugwe kuyoba, “Ko kukindananki iki ingamu ikusanusya?” Fiki, naloliloli, iyene ikusanusya ikindukimo. Ingamu yako yikulingania ubumi bwako. “Lilino, Nkundwe Branham, ugwe uli pa kubalamanambala.” Umma, une ngaya mma! Une ndi pa SYO IKUTI UNTWA! Fiki fyaali ukuti akabalilo kako Yakobo, umwene ali nu bumi ku ngamu yake, bo—bo nsyobi, unnyakafyuma, Yakobo. Kangi akabalilo kako Kyala asanwisye umwene, Umwene asanwisye ingamu yake. Kyala asanwisye Saulo ukuya kwa Paulo, Simoni ukuya kwa Peteri. Naloliloli, iyene yili ni kindukimo. Kangi Ricky na Elvis, ni ngamu bo isyo, yo ngamu ya kiAmerika kyamwisyugu iki kikutaagila umwanike nakalinga kulakula mula. Mukuketa iki une ngusanusya?

⁵¹ Lilino, une ngusubila une ndiku. . . Une kinunupo ngomokele kangi ndingabukaga kubutali fiyo kusulo apa, (muketile ifi une ngusanusya?) ukuti umwe mukabagila ukupilikisya. Loli ifindu fyosa ifi pope fitikupilikisigwa nu mundu ugwapaliposa. Abene batikukikola ikylene, panongwa yakuti abene bali nubukindilisi bumobwene. Ikyo kyene iki abene bikupilikako, a masyu ago.

⁵² Galipo a masyu ga baganabumanyi, Kikomyunisti, ukufinga ikindukimo iki abene bakabagila ukwima nakyo. Kangi pope ikiyabo kinywamu kya bandu ba kiAmerika bafungiligwe mu Kikomyunisti. Lilino, une mbukilemo mu Kikomyunisti, mfishu

fya Kikomyunisti, ndigi, mu Germany, kubusokelo ilisuba ku Berlin. Abene baali ni nyumba ingulumba inywamu ukubonesya panja. Ugwe gwende nkati mwa syene, isyene sikamalisigwa nukumalisigwa mma. Ikyene kyo kyuma kisyobi, abene bikugela ukugutila mmwanya ikindukimo.

⁵³ Kangi, mu Russia, kuko i kiKomyunisti, kyapapiliigwe. . . Iki, ifyinja fingi ifi fikindilepo, akabalilo kako une itolo naali ndumyana ndumbilili, une mbagile ukuyoba ifyinja malongu-matatu-na-fitatu fikindilepo, akabalilo kako kiNazizimu, kiFasizimu, ni kiKomyunisti fyafyukaga, une natile, “Une nguyoba mu Ngamu ya Ntwa! Fyosa fisakumalikilaga mu ki Komyunisti.” Loli, ngimba ugwe gwinogwinemo siku, Kyala atulekiile uswe injila yakusookela, linga uswe itolo tukuyega iyene. Balipo yumo mwa mia ba Russia aba ba kiKomyunisti, yumo mwa mia, loli abene bo kiyabo iki kikulagila. Yumo mwa bamia ba kiKomyunisti. . . yumo mwa mia gwa Russia yo kiKomyunisti, ndigi, loli abene bikulagila.

⁵⁴ Kangi ikindu kilakila, Hollywood yo buyo bumobwene, loli abene bali mbulagili.

⁵⁵ Ukufwana yumo mwa batatu pamo babili mwa batatu gwa kilundilo kwa United States bikubuka ku kipanga, kangi bingilakipanga, loli abene bikulagila mmipaaguko igyo.

⁵⁶ Iki i kiKomyunisti kikulondigwa kula kyo Masyu ga Kyala gafyuke nkati mmyabo, kangi Agene gikukibikaga ikyene ku soni.

⁵⁷ Mu Finland, akabalilo kako undumiana unnini yula asyukege ku bafwe ilisiku lila, kangi abene bandwalaga une ulubingilo lutatu kubutali, kuko umwinitu unnini uyu asyusigwe, umfwe; Abasikali ba kiKomyunisti, baRussia, bimile pala nisalyuti ya kiRussia, kangi amasosi gikwikilila mmasaya gabo. Abene balinkuti, “Uswe tukwambililaga u Kyala uyu abagile ukusyusa abafwe.” Ubwene bo buyongi bwa kipanga kya Katolika ni kipanga kya Luteri, kangi ni mipaguko gyosa, kangi abene bikwegga ihela syosa, nukuyenga ifibugutila, nukubapa abandu nakamo. Abene bikuya nu bumi bo bandu balibosa. Pabagile ukuyapo. . .

⁵⁸ Iki Russia ikulondigwa yo nsololi ukufyuka pa buyo ni Lisyu lya Kyala, uyu abagile—abagile ukukwigala akanwa. Polelo amalongo mahano na mana mwa mia bisakwegaga ubuyo.

⁵⁹ Iki Amerika ikulondigwa yo Masyu ga nsololi gwa Kyala, uyu aabagile ukwima nu kukemela Hollywood, kangi ukukemela ifindu ifi mu Ngamu ya Yeso Kristi, kangi Ikipanga kya Mbepo Mwikemo kisakwegaga ubuyo. Ubufubanie bwingi fiyo, muketile, a masyu mingi fiyo agakulwana ni Kyene.

⁶⁰ Ikipanga, a masyu gake, kilikyosa kikulonda abandu abingipu. Aba Baptisti bikulonda kyosa ikyene, aba Methodist bikulonda kyosa ikyene, aba Presbyteri. Uswe tuli nafyo fyosa

ifi. Kangi aba Katolika bikuboneka ukuti bikwegaga kyosa ikyene, kangi abene bikubombaga. Ago go katikati Masyu ga Kyala ukufuma mu Libangeli ili. Abene bisakulagilaga.

⁶¹ Loli u Kyala Ugwapamwanya Unkinde isakulagilaga kubumalikisyo. Abikemo bisakwegaga ubuyo, ilisiku limo, i Libangeli liyobile lululo. Abene bisakwegaga ubuyo.

⁶² A masyu mingi nubupelabusisya! Popapo galipo a masyu ga nsololi unsyobi. Ago masyu matilisiye, unnyambala uyu ikwikolela mwene nsololi. U nsololi, ena, yo ndumbilili. Iisyu lya mwisyugu “nsololi” naloliloli likusanusya “unnyambala uyu ikulumbilila pasi pa lonelelo.” Alipo unnyambala uyu ikwima nukwikolela mwene nsololi, kangi umwene ikukana i Lisyu lya Kyala, ikukana Ubwanaloli bwa Kyala. Galipo a masyu mingi fiyo!

⁶³ Pitasi panandi itolo, alipo unkundwe panja pala uyu andongosyaga une kuko une nisege apa, loli une. . . ngusakikisya umwene aaswigaga fiki une ngindilile ukubuka ndukindi nukusyumbutuka nu kugomoka. Linga uli apa, nkundwe, une napilikisya ku kindukimo, umwene aali mwinitu gwitu—gwitu gwalangi, ugwakinegro. Abeni bali ni tempeli apa, kangi abene bikuyikolela iyene, “Eliya Mohammed,” pamo kindukimo, “Eliya Mohammed unnini.” Ikufyusya a masyu, kangi aayobaga ukuti abene bo lisyu lila ikyo kyo kikutwala i—i kikolo kya langi ukusooka mbufubanie ubu. Ikyo, umwe muketile, ikindu kilakila, Nsilamu gwabo—gwabo—gwabo, Umsikiti gwabo. Fiki, mutikuketa umwe, ukuti ulwalo lulalula ulwa ikyene, ikyene kisobi!

⁶⁴ Abandu abalaangi, itolo bo ba bandu belu, abandu ba bulauni, kangi abandu ba yelo, komma ukugomokela kwa Mo- . . . ukugomokela kwa kiMohammed, loli isaga ukugomokela kwa Kristi, ifimanyisyo filafila ifi i Libangeli likumanyisya. IkiMohammed kikulwana ni Lisyu. Lilino, une naali nu lusako ukuloongosya aba kiMohammed maelifu kalongo kwa Kristi akabalilo kamokene ku Durban, South Africa. Ikyene kikutwala nakimo loli yu kubalaminogono. Kangi kibalaminogono ali kanunu pene papo kibalaminogono atikukana i Lisyu. Loli akabalilo kako kibalaminogono ikukana i Lisyu, kokuti kibalaminogono gwabutungulu. Ikyene ikupa akogo akasitakusisimikisigwa. Kilipo, ikindu kilikyosa kikumalikaga loli i Lisyu lya Kyala, Yeso aayobile lulo, “Kumwanya na pasi fisakumalikaga, loli i Lisyu Lyangu litisakumalikamo siku.” Polelo, umwe mukete uswe tukufimbilisigwa ukwima ni Lisyu, a Masyu.

⁶⁵ Bingi fiyo bikufubania ifindu! Abandu bikwima, abene bakalimanya i Lisyu, kangi abene bikuyoba ifindu, kangi lumo ikyene kikupilikigwa ukuya kyamahala. IkiKomyunist kindu kyamahala fiyo, “Aligwesa afwene. Akayapo yumo

kangi uyu yo gwakwilundikila, abene bosa ba kiKomyunisti.” Ngimba umwe mwimilepo ukwinogona ukuti ikyo lo lusasano lwabutungulu, ikiKomyunisti kili? Kangi ko kugu uku ikylene kyegelele? Ama. . . Yeso aatile, “Imbepo sibili sisakuyaga kifuki fiyo, ukwene kwabagile ukusyoba Abasaligwa linga syaali syakubombigwa.” Kangi kilikyosa setano ali nakyo, ikylene kyo buniongafu bwa ifi Kyala aapelile. Ubonangi bo—bo bwikemo buniongele. Ubutungulu bo Bwanaloli buniongotoligwe. Ubulongwe bo—bo, akabombo aka Kyala atwikisye uswe, kaniongele. Ukusitakwitika kosa ko buniongale bwa lwitiko. Ugwe kufimbilisigwa ukukana u Bwanaloli ukuti gwege u—u buniongafu. Muketile, gololaga a masyu aga, gagelaga agene ni Lisyu kangu ketesya linga agene bo Bwanaloli.

⁶⁶ O, mumo uswe tubagile ukindilila apo na apo, pa masyu ago agamwisiyugu, loli akabalilo kitu kakindile. Loli, a masyu mingi fiyo mpaka abandu batikumanya isyakubomba. Aba Methodisti kubumalikisyo bisakumpilika undumbilili gwa ki Baptisti, abene bisakubuuka kula, abene bisakwitugasyaga kula pakabalilo kangi polelo abene bikubuuka ku gwa kiLuteri. Kangi mu ba Pentekosti, abene bali ni fibugutila ifikindanekindane, kimo kisakubopelaga ku kimo, kangi kimo ku kingi, polelo ukubuuka nukugomoka. Ikyene kikubonesya ugwe ukwikasya mma. Pilika Amasyu Gake! Po apa Ikyene kilipo, kisimbigwe pa kalatasi, a Masyu, a Masyu gikusisimikisigwaga linga Agene go Bwanaloli.

⁶⁷ Ikisu kya kipanga kitikusimanya isyakubomba, ikisu kya ndyali kili mbufubanie. Kilikyosa kikufwana kili mbufubanie. Abinitu bikubopa ukufuma kuno, ikindukimo ikingi kikufyuka, bamo lijekete, bomo kijasi. Akabalilo kako une naali ku Roma, abene baali ni misumali imisisimikigwe kalongo na mihano na mina igi gyalingsigwe nkiboko kya Yeso; kangi gilipo mitatu gyene, loli pope abene baali nako ukusimba ukuti imisumali kalongo na mihano na mina imikindanekindane. Lilino, kukindana kuki uku ikylene kikapela ywani uyu ali nu nsumali? Kristi akaatulekilemo siku imisumali gyakuti twiputege, Umwene aatulekile uswe u Mbepo Mwikemo, ukwisila mu Lisyu Lyake! “Ifika ifi fikukongaga abene aba bikwitika, abene bisakuyaga ni misumali igyabwanalolo?” “Abene bisakuyaga. . . Ifika ifi fisakukongaga abene aba bikwitika, abene bisakwingilaga umpaguko Une naalyandile?” Umwene aalyandile nagumo. Keta mumo a masyu gakindene?

⁶⁸ Loli, “Ifika *ifi* fisakukongaga aba bikwitika: Mu Ngamu Yangu abene bisakusosyaga imisetano.” Ilisyu lyo ilyo. “Abene bisakuyobaga mu ndimi imbya; bikupimbaga imiyoka, ifyo fitisa kubafulasya abene. Linga abene bikunwa ifindu ifigogi, ikylene kitisakubatamia abene. Linga abene bikubika amaboko gabo pa babine, abene bisa kubumbulukaga.” Kangi umwe ketesya

ifindu ifi ukongelelapo gosa agangi aga Lisimbo ukubikigwa palikimo.

⁶⁹ Lilino, ikyo pakyene kitisakusisimikisya ikyene, umma mulimosa. Apo po uswe twe ba kiPentekosti tukuya pa nsebwe unsobi. Ngimba Yeso aakayobile, “Bingi bisakwisa kwa Une mu lisiku lila, nukuyoba, ‘Gwentwa, ngimba une ngabomba ifindu ifyamaka mu Ngamu Yako? Ngimba une ngasolola mu Ngamu Yako? Ngimba une ngabomba fyosa ifi mu Ngamu Yako?’” Kangi Yeso aatile, “Sokapo ukufuma kwa Une, umwe mwe mukubomba ubutulanongwa, Une siku ngabamenyemo umwe.” Umwe muketile, kalumbu gwangu kangi nkundwe gwangu, fiki une ngukemela kangi ngusimika ingulilo iyi? Ugwe ubagile ukuyoba nu lulimi bo bandu kangi Bandumi, ugwe ubagile ukumoga mwa Mbepo ukusyungutila ikipanga, ikyo kikaya ni mbombo na Ikyo.

⁷⁰ Une mbabwene aba kiMohammedi bikumoga ukusyungutila bo ulu. Une mbilike mu nganga. . . ndubingilo lwa nganga gwa bulosi, ngetiile abalosi bikwima nukuyoba mu ndimi nukusanusya isyene, kangi ukuyoba katikati iki kyangiti kibonekege, kangi ikyene kyabonekaga lulalula. Une ngetile kyope ikisimbilo kikusumuka nukusimba mu ndimi inhesya, kangi yumo pala aabagile ukubala ikyene, kangi kyaali kwa setano. Ugwe ukabagila ukwala ubumalikisyo Bwabwilanabwila bwako pa bwipilike bumo. Setano abagile ukwegelela kilikyosa kya fyakwipilika ifyo. Komma . . . Ukwene ko kumanya Kristi, ikindukimo kikusanusigwa mbumi bwako. Ketesya ubumi bwako nukwegelela ubwene pa Lisyu, kangi keta apa ugwe ulipo. Iketesya ugwe, naloliloli.

⁷¹ Palema nalinga ifyakwegelela fyosa ifi, a masyu agabutungulu, abasololi ababutungulu, fyosa ifindu ifingi ifi fikufyuka, Yeso pope aatile, palema nalinga fyosa ifi, “Linga umundu aligwesa ukupilikaga a Masyu Gangu nukungonga Une.” Umwene yo Lisyu. Pilikisya, ubutume Bwake kwa uswe umwisyugu, mu masyu gosa aga. Aga, une njobile ikyene kikwega isala nyingi ukutwala panja a masyu gosa aga. Kangi ukwene kukufubania abandu, ikyene ikindu ikipelakisa. Kangi, ukumalisya kwa fyosa, ugwe utikuya nu lusako lwa kibili, ugwe kufimbilisigwa ukusala Ikyene lilino. Ugwe ubagile kusita kulwaga ulusako ikiloiki. Ugwe ubagile ukusita kulwaga ulusako kilabo. Ikyene kyo lilino! “Akabalilo kako ugwe kupilika a Masyu Gangu, komma ukuumika indumbula yako, bo mumo syayile mmasiku ga lusambulo. Lilino ko kabalilo. Aka ko kabalilo akitikisigwe ukuti linga umundu aligwesa ikupilika a Masyu Gangu.” Ikyo kikubuka ukubonesya ukuti a Masyu Gake pope gikuyaga ngapo pala nkati mwa bufabanie bosa. Umwene akaali ali nago a Masyu! Fiki? A Masyu Gake gikuyaga ngapo bwila. Kili apa ikyene, “Kumwanya na pasi fisakumalikaga, loli a Masyu Gangu gatisakumalika umma,” Ilisyu Lyake.

⁷² Unko uswe itolo twege, tutigi, amaminiti mahano agangi, nakalinga. Ngimba mubagile umwe, mukwitugasyaga akabalilo ako, pamo amaminiti manandi? Lilino, une njemwengo. Unko itolo twege bamo aba baapilike a Masyu kang'i balipilikile Ilyene. Mumo Ilyene iyapaelile abene babombelege, fyo fiki Ilyene iyabapelile abene ukubomba. Lilino, une ngukilaniaga mwingi mu—mu Lisimbo muno, ukuti itolo ukwisa kulakula kwa umwe: mumo Ikyene kyanwisye ubumi bwabo kang'i bosa abene iki kyaali kya abene; mumo abene balinkuya bakindane, uswe tukubakolela u “nkindane.” Unnyambala aligwesa uyu itiikemo Kyala, abiikigwe ukuya nkindane. Panongwa yakuti, linga ugwe kubuka ni kisu, kalipo akandukamo kasobe na nugwe. Ukuya Nkristi ugwe kufimbilisigwa ukuya nkindane. “Kabuno bosa aba bikuya nu bumi bwakyala mwa Kristi Yeso bisakukubilwaga ubufwimigwe bwa kisu. Umwene aali nkisu, kang'i ikisu kyapeligwe nu Mwene, kang'i ikisu kilinkusita ukumanya Umwene umma.” Nakalinga lilino, pilikisya kifuki bo uswe tukwigala.

⁷³ Adamu aapilike a Masyu Gake, mbutalalifu bwa namayolo, kang'i ali nubwinake nu Mwene. Kakalipo nakamo akakulumbusya kwa Adamu. Umwene aapilike a Masyu ga Kyala, kang'i umwene aatile, “Tata, lilino une ngwilambalika une ukugon'utulo.” Kang'i umwene alambalalaga, nu Eva ndufugato lwake, ingalamu, iliboole, ni finyamana filambalele ukusyungutila umwene, kakaalipo akakufulasya mma, injila nayimo iyakuyila mbine, injila nayimo iyakuswiga linga umwene ikusumukaga kulubunju, abene bikusumukaga. Adamu aapilike a Masyu Gake mu njila iyi umwene abaagile ukugapilikila Agene.

⁷⁴ Loli ilisiku limo umwene aapilike a masyu ga nkasi gwake. Une kinunupo nkileke kyene pa kabalilo. Loli umwene aapilike a masyu amasobi, palema nalinga umwene ali nkasi, ukupinya ukwakifuki ukukinda fyosa iki ali nakyo pa kisu. Fiki umwene akabombile, bo yu Yobu, “Ugwe kuyoba bo nkikulu untoyofu?” Linga kyaali ikyo, ikikolo kyosa kya bundu angali kili nu bumi mbuyo bwa kufwa. Ikyene kyanwisye injila ya bandu na kabalilo. Loli umwene aapilike a Masyu ga Kyala, umwene ali nu bwinake na Gene, loli akabalilo kako umwene asanukege. . . . Aamenye bulebule umwene ukuti unkasi asobile? Kumbukaga, ikyene kyali kinyafu.

⁷⁵ Uswe tukwinogona umwisyugu ukuti ikibugutila kyitu, ikipanga, uswe tukwinogona ukuti ubukabi bwitu umwisyugu yo Kyala ikusekela pa uswe. Ikyene kikuboneka kinunu. Ikyene kyabonike kinunu akabalilo kako Mikaya aalimile pala pankyeni pa basololi bamia bana, kang'i ikisu kyosa kyaali kyabo, kang'i aba Filisti baali pa kyene, pamo, aba Siria, ikyene kyabonekaga kanunu. Abasololi aba bayoobaga, “Buka kula, kila kyitu. Kege ikyene!” Loli ago gakali Masyu ga

Kyala. Kangi Mikaya asanwike nukuguna a masyu gala. Kangi umwene ameenye bulebule ukubomba ikyo? Panongwa yakuti imboniboni yake yali katikati ni Lisyu. Iyo yo njila yene iyakukisubila ikylene nukuketa ikylene, ikylene kikufimbilisigwa ukuya pa Lisyu.

⁷⁶ Polelo ngimba muketesisye umwe? Bo Adamu apilike ku masyu agangi palubafu a Masyu ga Kyala, unkasi gwake mwene. . . Kangi ikipanga kikupilika ku masyu ga kibugutila kyake, ukwingisyamo nkati mwabo ifimanyisyo mbuyo bwa Lisyu, ukubitikisya abene bayege nu bumi mu njila yiliyosa abene bikulonda. Pene papo abene bikubuka ku kipanga kangi bingile ikipanga kimo, ikyo kyo kyene kinimbombo. Ikipinyililo ikyakifuki ukukinda fyosa iki umwitiki alinakyo pa kisu, ku bene, yo kipanga. Loli umwitiki, umwitiki ugwabwanaloli, ikipinyililo ikyakifuki ukukinda fyosa yo Mbepo Mwikemo, lyo Lisyu lya Kyala.

⁷⁷ Polelo ugwe kwagaga ukuti Adamu abwagenie ubwitugasye bwake, kangi umwene alinkupilika a Masyu ga Kyala gikukolela kangi, kangi umwene aafwele amani ga maafilu lelo. Loli agene gali Masyu ga kukemela, “Fiki ugwe ubombile iki?”

⁷⁸ Une nguswiga linga Amerika umwisyugu, pamo ikisu mu nguuto yake yabwiputiputi, muno ikylene kiyilile, kangi Amerika ikumila, ikumilwa, umwene isakuyaga kyakwiputa kya kisu lululu ulu. [Buyo busitakandu pa tepi—Nsimb.]

⁷⁹ Ywani itugesye pankyene pa une? Une mmenye agene matepi kangi ilyene likubukaga ku kisu kyosa ikypasi. Uswe tuli ni mbatiko sya matepi, ukuti i Ndumi yiliyosa ikwega ikisu kyosa mula, ifisu fyosa.

⁸⁰ Loli, linga ugwe kuketaga nukuketesya, ugwe gwimile itolo mmani ga maafilu. Akabalilo kako a Masyu ga Kyala agwabwanaloli gikusooka, abene batikumanya isyakubombapo pa kyene. Ikyene kikufubania, abene batikumanya isyakubomba.

⁸¹ Nakalinga, Noa aapilike a Masyu ga Kyala. Ilyene liitendekesyaga ukupoka ubumi bwake, kangi umwene akongile ingomelesyo kangi umwne aliyimike.

⁸² Linga umundu apilike a Masyu. . . Lilino pilikisya, kolaga iki kanunu naloli. Komma ukutoligwa. Linga umundu ikupilika a Masyu ga Kindukimo, kangi Ikyene kisisimikisigwe ukuya Masyu ga Kyala, kangi pa kabalilo, kangi polelo ikyo kikusooka ukufuma ku mundu, kumwanya na pasi fisakumalikaga loli ukuti i Lisyu likabagila ukumalika.

⁸³ Noa aapilike a Masyu, kangi aakemile ikisu. Kangi abene balikuseka nkisyo kyake panongwa yakuti i Ndumi yake—yake yikafwene ni fiponjole fyabo ifya sayansi, loli ukwene kwatimile nukonanga ikisu kyosa. Muketile? A masyu gake aga gasookile,

imbeyu yagonile mula. Ingulilo yiliyosa ikyene kyaali njila yilayila.

⁸⁴ Samueli, alinulutende bo umwene aapilike a Masyu ga Kyala, ukuti umwene aali...ukubuka ukunkemela Eli, unnyambala uyu alinswilile umwene. Unnyambala uyu aali tata kwa mwene kangu alinkusisye umwene nukunswila umwene.

⁸⁵ Mwe balumbilili bakundwe, njobe une? Abalumbilili, utubalilo twingi, pa buyo bwa mipaguko gyabo ni fimanyisyo, ifyakubatufya fyabo fili mu nyambi syabo, ifya tata yulayula, ikibugutila kilakila iki kibatendekisye abene nukubaswila abene nukubakusya abene nukubabika abene mbuyo nkipanga, nukubabika abene nkilundilo, ugwe kufimbilisigwa ukukoomola pasi kwa ifi abene bikumanyisya. Muketile? Kyo kindu kiliku ikisisya iki ikyene kiyeye kwa gwambombo ugwabwanaloli gwa Kyala ukupilika a Masyu ga Kyala nukufimbilisigwa ukugomokela ku mamakibugutila kilakila, ikuyoba, “Umwe mutagigwe kabuno umwe mutikwambilila i Lisyu ili.” Kyo kindunki!

Ikyene kyaali kikafu kwa Samueli. Loli umwene aali nsololi, umwene afimbilisigwaga ukubomba ikyene. Kali ikyene kyababaga pamo mma, umwene afimbilisigwaga ukubomba ikyene mulimosa.

⁸⁶ Mose aapilike a Masyu ga Kyala. Umwene aliswile ni fimanyakyala. Umwene aamenye *mbwingililo* na *mbusookelo*, loli ikyo kyatoliigwe. Umwene aapilike a Masyu ga Kyala, Mose alinkusita kuya yulayula siku kangu.

⁸⁷ Kangu nayumo umundu ikuya yulayula siku. Ugwe ubagile ukupilika mu mbulukutu syako a—a Masyu gikuyoba, loli akabalilo kako ugwe kupilika mu ndumbula yako, a Masyu gikuyoba, uketile, polelo ugwe kupilika. Ugwe utikuketa ni liso lyako mma. Ugwe kuketa ni liso lyako, ugwe kuketesya ni numbula yako. Ugwe kuketa ikindukimo, kuti, “Une itolo ndikuketa ikyo mma,” ugwe kusanusya ugwe utikupilikisya ikyene. Ugwe utikupilika ni mbulukutu syako umma, ugwe kupilika ni ndumbula yako. Utubalilo twingi imbulukutu syako sikupilika a Masyu ga Kyala agabwanaloli, kangu Agene gikugwamo ukufuma kwa ugwe bo ga misi ukufuma pa nyuma ya lisekwa. Loli linga ugwe kupilika naloliloli, ugwe kupilika ni ndumbula.

⁸⁸ Kangu ubumanyakyala bosa ubu Mose aalinabo, umwene akaali akapilike a Masyu ga Kyala. Loli ilisiku limo Kyala akoliile untimi gwafyinja malongo mabili na matatu uyu kula kulubafu ulungi nukuyoba ku mwene, kangu umwene alinkukikola Ikyene. Umwene asisimikisye ukuti Umwene aali Kyala. Ikindu kyakwanda Umwene aabombile kwa Mose, kyaali kusisimikisya i Lisyu Lyake, “Une ngwika, Une ngumbwike iki Une naafingile.”

⁸⁹ Kangi iki kyo iki Umwene aafingile ku masiku ga bumalikisyo. Umwene ikutupulaga abandu ukufuma mu Bapanja, kangi ni fingo syosa.

⁹⁰ “Iki une mfingile.” Alinkuti, “Mose, fula ifilato fyako.” Mmasyu agangi, yindika Ikyene. “Lilino taga pasi ingili yako.” Kangi ingili i—i nyumano ukufuma ndulanga yilinkuya njoka, kangi Mose alinkukola iyene, kangi iyene yilinkubuka ukugomokela ku iki iyene yaali. Muketile? Umwene ameenye ukuti uyo aali Kyala, kabuno Kyala aatile, i Lisyu lya Kyala, i Lisyu ukuti Umwene aayobaga, alinkuti “Taga pasi ingili iyi yili nkiboko kyako.” Ilyo lyo Lisyu lya Kyala. Komma ukubomba ikindu kilakila, ilyo likaya Lisyu lya Kyala kwa ugwe, ilyo lyo Lisyu lya Kyala kwa Mose. *Apa pali* Lisyu lya Kyala kwa ugwe! “Taga pasi ingili.” Iyene yilinkusanuka njoka. Alinkuti, “Lilino ngimba ugwe kuyitila iyene? Yikola iyene ku mpepe,” kangi ukugomokela iyene yilinkubuka kangi. Ilisyu lya Kyala ku mwene. Ngimba Umwene aabombile fiki? Kyala aasisimikisye i Lisyu Lyake.

⁹¹ Une nakoleligwe apa imyesi minandi igi gikindilepo, ukufwana, kwaali, o, ikyene kyaali kyinja, ukukinda ikyinja. Unkikulu unnini kubumalikisyo bwa buoinyililo ya foni, nu ndumbilili gwa ki Baptisti nu ndumbilili gwa ki Pentekosti. Umwene aatile, “Nkundwe Branham, Untwa ambelile une ukuya nsololinkikulu.”

Ndinkuti, “Kanunu.”

⁹² Alinkuti, “Ugwe umenye, une mbuliigwe ukuti ugwe uyobile ukuti ugwe—ugwe ufumwisye ukuti ubutumigwa bwangu bwaali bwa Kyala.”

⁹³ Lilino, une ngabaagile ukubomba ikyo, ikyene kitikwitikisania ni Lisyu. Polelo une naatile, “Nkikulu, ubo busobi. Une ngakumanya nukumanya ugwe mma.”

⁹⁴ Kangi undumbilili gwa ki Baptisti, une naliimpilike umwene, une naliimpilike undumbilili gwa ki Pentekosti. Umwene aatile, “Mulimosa, une ndinulukomano kuno.” Kangi aatile, “Untwa ikubomba ifindu ifikulumba.”

⁹⁵ Une ndinkuti, “Une ngupalisya pa ikyo.” Umwene alinkuti. . . Une ndinkuti, “Ngimba Umwene akubulilemo siku kalikosa mpaka lino?”

Aatile, “Ena, une ndinalo ulubatiko ulukulumba pa nkyeni.”

⁹⁶ Une ndinkuti, “Syakuhobosya.” Une ndinkuti, “Lilino, ulubatiko lwako lo luki?” Une ndinkuti, “Ngimba Untwa akubulile fiki?”

⁹⁷ “Umwene aatile, ‘Buka ku Phoenix, Arizona, pisiku *lyakuti-lyakuti*, kangi polelo Une ngukupaga ugwe i Dutchman Gold Mine injonge yila, kangi ugwe kwegaga u golidi uyu ikwagigwa mula kangi ugwe kupaga ihela ku ba misiyoni ukubuka

ukusyungutila ikisu kyapasi.” Na papo uswe tumenye ukuti i Dutchman Mine injonge yila ko kapango. “Momumo Umwene aayobile.”

⁹⁸ Une ndinkuyoba, “Mulimosa, une ngukubulaga ugwe mumo kusyagilaga ukuti yo Kyala pamo umma.” Une ndinkuti, “Ugwe uyepo pisiku ilyo. Kangi linga yo ugwe gwe kupaagaga pa Dutchman Mine injonge yila, kokuti yo Kyala. Linga ugwe utikupaga pa Dutchman Mine injonge, polelo gwilate kangi usosye imbepo yabutungulu iyo ukufuma pa ugwe.” Iyo yo njila ya kwagila ukuti kali yo Kyala pamo umma.

⁹⁹ Kyala aatile, “Mose, taga pasi ingili, kangi iyene yikusanukaga ukuya njoka.” Umwene abombile ikyene. Umwene aatile, “Pimba iyene kangi iyene yikuyaga ngili kangi.” Umwene abombile ikyene.

¹⁰⁰ Akabalilo kako Kyala ikufinga ulufingo ulwa butumigwa mmasiku ga bumalikisyo aga, Umwene isakusisimikisya ikyene itolo katikati injila iyi Umwene aayobile Umwene ikubombelaga ikyene. Polelo ugwe kumanya ugwe uli nago a Masyu amatalusye. Ugwe kupilika ku Kindu ikitalusye, pakuti iliyene lyo Lisyu likwisimikisya. Muketile? O, bule... Une nhobokela, une... Fyosa filikanunu.

¹⁰¹ Mose abombile mbukindane. Keta iki i—i ikindu ikisekesye iki Mose aabombile. Lilino, akabalilo kosa linga ugwe kukongesya a Masyu ga Kyala, ugwe kuya nsyungutilamutu, ku kisu. Ilisiku lya kilabo, lyalimmwagile Mose, nu nkasi itugesye pa mbunda, kangi umwanike pa lufugato lwake, pamo ko njobelo ya kwitongo, “mwanike” pa lufugato lwake, kangi pala balinkuya. Unnyambala unkangale uyu ni ndefu syake sikwikilila pasi bo *ulu*, kangi untu gwake ugwakipala gukumulika, ingili nkiboko kyake, ikulongolela akambunda akanini, ukubuka kulakula ukwingilila Igupto nakalinganakalinga fiyo mumo umwene aabagile ukubuka. Umunduyumo alinkuti, “Mose, ngimba ugwe kubuka kugu?”

¹⁰² “Ngwikilila ku Igupto, ukwakwega ikindu kila ukugomokesya.” Palema nalinga umwene aatoligwe bo ntubwa, umwene aatoligwe bo nnyambala gwabwite, loli apa umwene ikililaga ukwakuponjola. Kangi umwene abombile ikyene. Fiki? Umwene aapilike a Masyu ga Kyala nukulibona Ilyene lisisimikisigwe ku lisiku lyake; kabuno ifindu ifi fyatigi fiyeko mwisiku lyake, umwene aketile ikyene.

¹⁰³ Paulo, umFarisai ugwakwipela-mwene, iswile itolo nu bumanyakayala mumo umwene abaagile ukuya, loli ilisiku limo umwene aapilike a Masyu ga Kyala. Umwene ayibwene i Mbanda ya Moto, kangi umwene aamenye kyalipo kimo ikikindane. Ikyene kyanwisye ubumi bwake. Kali baali ba Farisai balinga, baali ba Gamalieli balinga pamo ikindu ikingi kyakutaga kwa

Paulo, “ugwe uli nsobi, uge uli nsobi,” Paulo atalile aapilike a Masyu ga Kyala, umwene aamenye Ikyene kyaali Bwanaloli.

¹⁰⁴ Peteri, mwiputiputi mumo umwene abaagile ukuyila, ukwima ni nyiho syabakulumba, umwene akabaagile ukulya inyama yiliyosa itolo. Umma, nkulumba. Umwene akalinako nakamo akakubomba ukufwana nu lwene mulimosa. Umwene naloliloli imaga nasyo inyiho sya bakulumba, kulakula ku Lisyu. Fiki fyabonike? Ilisiku limo umwene aapilike a Masyu ga Kyala, “Komma ukukikolela ukuya kyaitolo kangu kyakinyanyasi, napapo Une nkyelwisye.” Umwene ali nnyambala unsanusigwe. Umwene aalitendekisye ukubuka kulikosa Untwa alintumile umwene.

¹⁰⁵ Pakwigala, une mbagile ukuyoba iki. Aalipo unnyambala yumo akabalilo kamo uyu aali mwitiki. Umwene aafwile amasiku mana. Umwene aali mwipumba, ikununga, loli umwene aapilike a Masyu ga Kyala gikuyoba, “Lazaro, sooka panja!” Kangu linga Ilyene lyasosisye unnyambala panja ukufuma ukuya mfwe kangu mbolano, kyo kiliku iki Ilyene likubombaga kukipanga iki kikaali kili nu bumi mu kyene? Ilyene libagile ukusyusya abene, mbufubanie bwa masyu gosa ag’uswe tugayobilepo, agabwiputiputi, indyali, Hollywood, ubusololi bwabutungulu bosa kangu ifindu ifi fisookile. Pakati pa fyosa ifi, a Masyu ga Kyala agabwanaloli gisakukolelaga unnyambala, uyu afwile mu bonangi ni ndabanio, ku bumi kangu. Ilyene libagile ukwega ikipanga ikigomokelanyuma nukukikolela ikyene ku bumi kangu. Naloli!

¹⁰⁶ Kumbukilaga, bo tukwigala, une nguyoba iki, kangu polelo une ngwigalaga. Yeso aatile, “Akabalilo kakwisaga, akabalilo kako bosa aba bali mwipumba bisakupilikaga a Masyu ga Kyala.” Kangu ugwe kupilikaga Ilyene. Kali uli mubwitugasye buki ugwe, ugwe kulipakaga Ilyene mulimosa. Kangu bamo mwa bene aba bikusooka kwipumba, bisakwisaga kukutagigwa. Abene bikupilika a Masyu, loli Ilyene lya kubataga. Kangu linga ugwe kupilika Ilyene umwisyugu, “Umwisyugu, bo akabalilo katali kakindilepo, linga umwe mukupilika a Masyu Gangu, mungumikaga indumbula syinu, mumo umwe mwabombile mwisiku lya lusambulo.” Kangu linga ugwe, abandu ba ki Pentekosti ukwibungania mwibene kula kufimanyisyo kangu, mu bwapanja, “ukuya nu luko lwa bunyakyala loli nukukana a Maka galimumo,” bo mukali ukufyuka mu lusyusyo kukutagigwa, panongwa yakuti a Masyu ga Kyala aga gikuyoba kya umwe lilino ukwisila mu Lisyu lisakubatagaga umwe mulisiku lila.

¹⁰⁷ Linga ugwe uli itolo mwitiki undungufu, a Masyu ga Kyala gikukuta mu ndumbula yako ulubunju ulu, “Ugwe gwe mwitiki undungufu,” ugwe kinunupo pinduka!

¹⁰⁸ Umwe banyambala, bakikulu, balumiana pamo balindwana, mwe mutikuya nu bumi kwa Kristi, kangi a Masyu ga Kyala gikuyoba kwa umwe ukwisila mu Lisyu Lyake kangi ikuti, “leka ukubomba ikyo,” ugwe kinunupo bomba ikyo. Panongwa yakuti ugwe kupilikaga Ilyene kangi ilisiku limo, kangi Ilyene lisakukutaga ugwe. Ugwe ukabagila ukulikana Ilyene, Ilyene likuyoba kwa ugwe lilino. Kangi, kumbukilaga, ikyene kisimbiigwe.

¹⁰⁹ Kangi aba bikubomba kanunu nukupilika a Masyu Gake, bisakusyukilaga ku bwikemo, ku Lwimiko, ku Mwanya.

¹¹⁰ Polelo ugwe kupilikaga a Masyu ga Kyala akabalilo kamo. Lumo mwakimyemye ulubunju ulu Ilyene likuyoba mu ndumbula yako, ukuti ugwe ubagile ukupinduka ukufuma ku njila iyi kubuka, pindukila kwa Kyala. Lilino, kumbuka, abene bisakusimba a Masyu aga gikuyoba ku ndumbula yako, ku Mwanya. Kangi ilisiku limo akabalilo kako Yeso ikwisa, kangi bosa aba bali mwipumba, bosa, batalusye pamo bonangi, bisakusyuka. Kangi a Masyu gagaga aga gisakulandaga kukumyako ugwe kangi, “Mu Phoenix, Arizona, pa lubunju *lwakuti* ulwa Ndungu, akabalilo kako undumbili abakolile umwe pakabalilo katali, ikuyoba isya Masyu, Une nayobile ku myako; nababulile umwe bakikulu ukuleka inywili synu sikulege, leka ukufwala bobahuni; nababulile umwene banyambala ukusokako ku busyobi, ukukwesa; nababulile umwe balumbilili ukupindukila ku Lisyu Iya Kyala.” Muketile ifi une ngusanusya? Uko kokutalusya.

Amasyu aga kimyemye gala gikuti, “Ikyene kibagile ukuya kitalusye.”

¹¹¹ Linga une nafimbilisigwaga ukwisa bo yu Nikodemu, une pope ngali ngelile ukufika kula. Une angali nisile ku Mwene, nukubuka kuno ku lulanga kumo, nukuti, “Gwentwa Kyala, une ndi apa, pindusya une lilino. Mmataga une mbwigane Bwako.” Gomokelaga ku Lisyu. Kubuyobumo kuko ugwe kuketa ugwe kusokako ku Lisyu, gomokelaga nakalinga ukufuma ku ikyo, kabuno unyololo nkafu ukukindaposa loli apa monywa ukukindaposa. Kangi paliposa mbumi bwako apa ugwe ulekile indagilo sya Kyala, ukubombela ulwiho, apo po unyololo gukulatukaga kali ugwe uli nkafu bulebule pa findu ifingi. Kolesya ku kiboko ikyumilisi ikya Kyala.

¹¹² Unko twipute. Umwisyugu, bo tutagile akabalilo, Gwentwa, Ugwe uyobile ukuti Ugwe kuyobaga, Ugwe kusimbaga indagile Syako pa figemo fya ndumbula. Une ngamanya iki kimile pankyeni pangu. Ikindu kyene iki une mmenye ukubomba ko kwegu Ilisyu Lyako nukulisasania Ilyene panja, naloliloli Ilyene lisakwitugasyaga pasi pa mabwe gamo kubuyobumo. Une ngusuma, Kyala, ukuti ugwe kuyobaga ku ntubwa aligwesa, ugwafyinja fyapakati aligwesa, umundu unkangale, kilikyosa

ikyene kibagile ukuya. Yoba ku ndumbula yangu, Gwentwa. Yoba ku ndumbula sya babombambombo isi. Yoba ku ndumbula sya kilundilo.

¹¹³ Uswe tukwiputa, Tata, ukuti umwisyugu tukupilikaga a Masyu Gako. Kangi uswe tumenye, mumo ukwene kwayilile mu lisiku lya Samueli, imboniboni ya pabwelu kyo kindu kipala, kangi ikyene kyabaswigisye abandu. Momumo kiyilile ikyene umwisyugu. Uswe tuli ni njosi na bagoganjosi, tuli na bayobi na sanusyi, loli imboniboni yapabwelu yikwisa ni Lisyu lya Ntwa, kangi litendekesigwe. . . Uswe tukwiputa, Tata Gwakumwanya, ukuti a Masyu gala aga gakuutaga ndulanga, “Tendekesya injila ya Ntwa,” ukuti uswe twitike u Mbepo Mwikemo ikupa a Masyu ago kangi umwisyugu, “Itendekesya u Kwisa kwa Ntwa!” Kangi mumo Ilyene liyilile ubuhesya, kabuno galipo a masyu mingi fiyo agangi agakukibisya Ilyene nukulisosyapo Ilyene, loli Ilyene lyaipyana mu mbulukutu sya bene aba bikulipikaga Ilyene. Une ngusama ukuti Mbepo Mwikemo lilino ikubombaga imbombo mu ndumbula sya twesa ba uswe.

¹¹⁴ Kangi bo uswe tuli ni mitu gyitu gwineme, kangi une ngusubila indumbula syitu sineme: Linga ugwe umenye pabuyubumo apa ugwe ufuyile mbumi bwako, umenye i Lisimbo limo, ili ugwe ulimenye ukuti uko kumanyisya kwa Libangeli ili ugwe ukalikongesya mma, panongwa yakuti ikindikimo, a masyu ga Hollywood gakupelile ugwe ubombe ikindikimo ikikundane. Ubuyo bumu ubu umwe babombambombo mupagile mwi Bangeli, ukuti lyo naloli Bwanaloli, loli mumenye ukuti ikibugutila kyinu kikubasopaga umwe panja linga umwe mukumanyisyaga Ikyo, kangi umwe mumenye ikyene kyo naloliloli Bwanaloli. Kwa umwe bandu mwe mukwega ikindu ikisobi, mukwitugasya ubumi ubusobi. Umwe batata na bamama mwe mutikugela ukubafunda abana binu, nukusita kubakusya abene. Umwe mubagile ukugela kubununu bwinu, loli abene bikubuka kulakula mbwapanja mulimosa, loli umwe mubikile ifyakwegelelapo pankyeni pabo. Kangi linga umwe mutikubomba ikyene, a Masyu ga Kyala gikuyoba ku myako, “Komma ukubomba ikyo.”

¹¹⁵ Kangi lilino nu mutu guligosa gwineme kangi amaso gosa gigele, kangi Kyala gwa Kumwanya aliketa pasi mu ndumbula sya mundu yula uyu ali ninjala kangi ukwaga ubuyo papo abene basobi. Kangi ni kiboko mmwanya kwa Kyala, yobaga, “Gwentwa, une nubwanaloli ngulondalonda a Masyu Gako ukusosya ubusitakwitika kosa, kangi ifindu ifi fyosa ifi fikaya bo Ugwe, kangi mbela une ukuya iki Ugwe kulonda une nje.” Ngimba umwe mubagile ukufyusya ifiboko fyinu, bo uswe. . . ? Untwa akusaye. Kyala akusaye ugwe.

¹¹⁶ Polelo i Libangeli likuti, Yeso aayobile, kangi palema galipo a masyu gosa agangi aga, “Pope linga umundu ikupilikaga a

Masyu Gangu.” Nkongaga Umwene, ugwe kubwagaga ubwigane kwako.

¹¹⁷ Gwentwa, akabalilo kakumalika. Loli i Libangel liyobile ukuti, “Mumo bayilile ubwingi pakwitika, balinkosigwa.” Une ngusuma, Tata Gwakumwanya, ukuti bosa ba abene aba bafyusisye amaboko gabo mu kwilata kwanaloli, ukuti i Lisyu lya Kyala ili abene babalile, nukuketa ukuti abene basobi. Une ngaketa mma kwa sinda gwa bene. Ikyene kikaya kwa une ukuketa, ikyene kili kwa Ugwe ukuketa, Gwentwa. Ugwe umenye ikyakulonda ni fundo kunyumba kya kiboko iki kifuyukile. Bitikisyaga abene, ukufuma pa sala yiyiyi, bafingege mundumbula syabo, “Ukufuma mwisyugu, ukufuma apa, une ngwegaga i Lisyu lya Kyala na Masyu ga Kyala, nukulikonga Ilyene kali go ntengonki ugwene.” Kangi babike mminogono gabo, bo abene bikubuka, ulwimbo lwa nsimba’ndinganio, “Ngimba Yeso apimbege ikipinga mwene, kangi ikisu kyosa kiyege kyabuke? Umma, kilipo ikipingika kya aligwesa; kilipo ikipingika ikye une. Kangi ikipingika ikikemesigwe une nsangupimba, mpaka ubufwe bwisakumbikaga une mbwabuke.” Polelo akabalilo kako a Masyu ga Kyala gikuyoba, “Une ngusookaga mbwikemo Bwake, kabuno ngongisye a Masyu Gake, a Masyu ga Lisyu Lyake.” Une ngubabika abene kwa Ugwe lilino, Gwentwa, mu Ngamu ya Yeso Kristi.

¹¹⁸ Lilino bo uswe twinamisye pasi imitu gyitu, ugwe tendegega ukwilataga kwako nu lufingo lwako. Une nswigile ku ndumiana unnnini uyu itugesye apa, ikuniongasya untu gwake ukusyungila. Kangi galipo a Masyu ku kipanga, “Une ne Ntwa Uyu ikubumbulunya imbungo syosa.” Ago go Masyu nkipanga. Kangi mwesa ba umwe mwe mukulonda ulubumbuluso, kangi umwe mukwitugasya ubumi ubwimikigwe ku Lisyu lililyosa ilya Kyala mwe mumenye ifi fyo fitalusye, kangi umwe muli nukulondesya ububumbuluso, une nguswiga linga umwe itolo mukufyusyaga ifiboko fyinu. Fyusya ifiboko fyinu, “Gwentwa, une ndinako ukulondesya ububumbuluso.” Sili kanunu.

¹¹⁹ Lilino, imaga na Masyu ago mundumbula yako, “Une ne Ntwa uyu ikubumbulunya imbungo syosa.” Kumbukaga, akabalilo kako i Lisyu liyobigwe, Ilyene likufimbilisigwa ukwisa kukuboneka. Yeso alinkuti, Marko 11:22, “Linga ugwe kuyoba iki ku kyamba, ‘Epuka’ kangi utikwilamwa mma mundumbula yako, loli itika ukuti iki ugwe uyobile kikwisaga kububoneko, ugwe ubagile ukuya nakyo iki ugwe uyobile.”


¹²⁰ Lilino, aligwesa mu njila yinu mwibene lilino, inamisya imitu gyinu, tendeka ukwilata kwinu, “Gwentwa, une ngwitika i Lisyu Lyako. Une ngupilika a Masyu Gako gikumbula une ukuti Ugwe yogwe yulayula mmayolo, umwisyugu, kangi bwila.” Une ngubuka pakwenda pasi nukubika amaboko gangu pa mwanike uyu, panongwa yakuti umwene nnini fiyo akabagila ukumanya ukuti ikyene kyo fiki, undumiana unnunu unnini, uyu

afwene mbukusi kangi ingulilo ya Yosefu gwangu unnini. Kangi une ngulonda mwesa gwa umwe ukuti mwiputege, mwiputege, “Gwentwa, une ngupilika a Masyu Gako. Une ngwitika.”

¹²¹ Tata Gwakumwanya, uswe tukutwala ikilundilo iki kwa Ugwe kububumbulusyo bwa mibili gyabo. Kangi, Gwentwa, apa itugesye umwanike unnini umpelakisa, umwene ikukwabila amaso gangu ukukinda mosa mu Bulumbilili, ukuketa umpapi itugesye pala afugete akinitu akanini. Ukwisila mwa sayansi gwa mikota, lukayapo ulusubilo kuli umyana unnini uyu. Galipo a Masyu ga Kyala aga gikutoga pa fyosa. Kangi bo ikipanga iki kikolelene palikimo ukupela ululagilo lulilosa ulu une ndumenye akabombelo kake, ifingi ifyo fyo fyako Ugwe, Tata. Une ngwendaga pasi nukwakubika amaboko gangu pa mwanike yula.

¹²² Tata Kyala, mu Ngamu ya Yeso Kristi, une ngukemela iki. Itikisya a maka ga Kyala, ububumbulusyo bwa Kyala... Paliyaga ukukindana kumo mwa umwene mmaniniti mahano aga gikwisa...?...bosa abene bali...?...ku lwimiko Lwako.

¹²³ Tata Gwakumwanya, Ugwe ufingile ulufingo. Ikyo kyene une nkimenye, Ugwe ufingile ulufingo. Ulwene lubombigwe, mumo ilyene liyobigwe, “Linga ugwe *kuyoba* ku iki,” kangi une nguyoba ku bubine bulibosa pamo ubukomigwe ubu bukupinya ikilundilo iki, iki kikupinya abandu aba, imbepo yiliyosa iya kusitakwitika, une nguyoba, “Sokamo ukufuma mbandu aba, mu Ngamu ya Yeso Kristi!” Lilino, uswe tumenye ikyene kisimbigwe, kangi lilino ikyene kiyobiigwe, itikisya ikyene kibombigwege, ku luyindiko nu lwimiko lwa Kyala. Kangi mu Ngamu ya Yeso Kristi ikyene kisumiigwe.

¹²⁴ Lilino, ugwe gwe ubagile ukwitika, kangi kwitika naloli, kali ko kaki kakubonekaga, komma ukuya, imbeyu yigwile. Kala akandukamo akanini nkati mwa umwe, a Masyu gala. Mpapi gwa mwanike uyu, kali bo bwikalilo buki ubu umwanike uyu ali, ugwe ngimba kwitikaga imbeyu ya Kyala yigwile mu ndumbula yako, ukuti undumiana uyu ikuyaga kanunu? Mwe bangi ba umwe mukwiputa, yumo ku nnine, ngimba mukwitika ukuti imbeyu ya Kyala yigwile mu ndumbula syinu, “ububine bwangu bumalike”? Polelo ulwiputo lwa lwitiko lwiputiigwe kuli umwe, ingisya pasi ikikomo ikyo. Kangi linga Setano ikugelamo itolo, ugwe isaga itolo ukugomokela: “Gwimege mula mu kipanga kya kiSpanishi, ulubunju lula ulwa Ndungu, ulwiputo ulwa lwitiko lwaliputiigwe kuli une. Kangi Kyala aafingile!” Ulwiputo ulwa lwitiko lwisakupokaga ababine kangi Kyala isakubasumusyaga abene. Ikyene kisile kububoneko. Ngimba ugwe kwitika? Yoba, “Ameni.” Kyala abasaye umwe. Lilino une ngubikaga ulukomano ukugomokesya kwa Nkundwe Rose, une ngusakikisya apa, Nkundwe Jewel Rose. 

A MASYU GA KYALA MMASIKU GA BUMALIKISYO AGA KYA63-0120M

(The Voice Of God In This Last Days)

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Ndungu kulubunju, Januari 20, 1963, ku Apostolic Church mu Phoenix, Arizona, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org